

竹林八圩志卷十二

祝廷錫纂

叢譚

高遜志嘗評近代畫家云吳仲圭如老將麾旗勁氣崢嶸莫之能禦王立本如近代名流丰裁凝遠蕭然疲役邈不可羈盛叔彰如本色頭陀持戒精一不假言傳終克

證果范行式如羣鶴高飛迴脫塵表

兩浙名賢錄方技傳

遜志會試主考時禮部尚書鄭迪侍中黃觀知貢舉右拾遺朱逢吉編修吳勤葉惠仲趙友士徐旭張秉彝為同考官御史王度俞士吉監試皆一時之選迪觀惠仲度

死難

嘉禾徵獻錄

竹林八圩志

卷十二叢譚

一

高季迪送唐處敬序云予世居吳北郭同里友善者惟王止仲一人十餘年來徐幼文自毗陵高士敏自河南唐處敬自會稽余唐卿自永嘉張來儀自潯陽各以故來居吳而皆與予鄰於是北郭之文物遂盛矣是北郭十友初士敏處敬與焉其後徙居携李是以季迪懷十友詩不及也太常之死傳聞異辭革除遺事及吾學編皆云靖難師起存歿無考劉琳拊膝錄謂盛庸兵敗自經柳琰嘉興府志謂卒於官趙太守瀛嘉興圖經紀太常卒諡文忠彭比部輅亦云未知何據亡友蔣之翹楚墀嘗出其族譜有祖遠兢仕讓皇帝為文淵閣侍書實太常弟子有祭太常文

見文徵

然則金川門師入之後太常

自潔其身遠遯未嘗卒于官其詩有云生死尚無懼寵辱何足驚蓋矢之有素矣列朝詩集據鶴林集云太常作周尊師傳後題洪武三十五年歲次壬午春正月初吉前吏部侍郎太史河南高遜志又祈雨詩後書云河南高遜志大明洪武吏部侍郎因疑革除之後不署建文職官故稱洪武第壬午正月靖難師尚未渡江讓皇帝猶在位豈有預書洪武三十五年之事乎考革除之命是年七月始下則二書題名盖出於道士未足依據也

朱彝尊靜志居詩話

予嘗面請學使者以程公本立姚公瑄楊公任高公遜志建四忠祠於嘉興而以蔣侍書兢配食於高公之右學

竹林八圩志

卷十二 叢譚

二

使者諾而不果行也世有主持風教者表忠之典冀吾

黨君子留意焉

同上

高公故第在里仁鄉前明太常遜志避難入雁蕩死門人蔣兢以空中枯木葬於芙蓉山下當建文君遜位過其家遜志已遠出不遇廳前有大梅樹一株取食之題詩於壁云主人浮舸去燕子守空梁果熟無人賞留供過客嘗歎署飛霞二字

于尚齡嘉興府志按于志盖據沈廣文孟廬札記以前吳志伊志

皆未著此說而高氏子孫屢言自南園公始居竹林光裕堂之建在嘉靖癸巳則太常之未家竹林可知矣

建文帝之出走也曾至太常少卿高遜志家即余東鄰光裕堂也時高已全家他避室無一人帝率從官至聽事略坐見庭中梅實正熟乃摘食之題詩于壁云主人浮

舸去燕子空守梁果熟無人采留供過客嘗歎署飛霞
二字其家遂名其樹曰御梅三百年來樹甚葱鬱至國
朝康熙庚子雷擊而斃太常之十二世按當云孫復哉
大令士敦幼時猶見之親為余言孟廬札記
古來忠臣多矣而求祖孫數世自開國至末造盡忠不衰
惟東漢耿況及子弇不從王莽況之七世孫紀曹操將
篡漢紀與吉平謀誅操不克而死後漢書稱其家與漢
為興衰今吾里高氏自太常少卿高遜志與方正學同
忠建文不從永樂遜死雁宕山中遜志十世孫承埏死
守寶坻崇禎帝有功在封疆之褒明祚將移承埏以南
工部乞養憤鬱而死其盡忠于明與耿氏比烈沈銘彝
日記

竹林八圩志

卷十二 叢譚

三

高太常私諡文忠己酉歲厲公先生既訟父冤復拜疏為
太常請得照靖難死事諸臣例如卓敬之忠貞龔翊之
安節以私諡文忠定為正諡補祀表忠祠唐翰題
詩注

質庵公輅

家饒裕僮僕數十人嘗擇其俊秀者另延一師

課之有入泮者則于廳事置漆杌許同坐人以杌而驗
其入泮者之數公以為快一夕夢門外左柱繞一巨蛇
俄生數小蛇為龍飛去醒而異之及旦見一生來倚此
柱姿容雋雅問之曰吾異鄉人避難到此公謂應夢兆
遂贅為婿即高豐南也其子文登中隆慶丁卯舉人仕
至知州子孫科第不絕趙氏宗譜
按趙譜襲傳聞之
語為嚮壁之談即其自叙世系
太祖次子德芳檢宋史其甚表
則彝齋實德昭後其未足深據可見此條又其甚者

豐南公少失恃怙贅於趙氏外母張孺人為營新宅令地師擇地至周家橋北一茅舍老嫗居之後有枯塚嫗迎謂曰若高氏欲起宅耶夜來塚中鬼相語高氏當來居此遂於嫗所居處營數椽時為嘉靖癸巳豐南子文登方彌月也隆慶丁卯文登舉於鄉年已三十六少時與朱廷益黃正色正憲周從龍賀燦然孫成憲夏日葵徐名世姚思仁沈自邠等十一人為文會而九人皆登科第惟正憲名世以諸生老思仁性至孝而貧歲除文登入城辦卒歲之具見思仁徘徊水際問之曰歲暮無以為高堂歡明歲又失館無聊自譙責耳文登分所辦歲具之半與之且以明年所訂館席讓思仁而自往石佛

竹林八圩志

卷十二叢譚

四

寺聚徒焉趙廷用無後文登立其族孫懷溪按名思忭為後

又為之營田宅遺命子孫登科第必冠帶謁廷用墓高譜

長明公增光嘗歲暮往郡城郁澄宇燭肆購燭越宿而後

取澄宇為携入卧室誤雜綴珠金簪一對歸視始知之而已屆歲除不及還郁氏索簪急問家舉誓誤疑一人其人無以自明將投鐲適公賀歲入郡持還其簪事乃

得白趙譜

高道素水部當桂藩分建奉命將作南方卑濕薄櫨甫新大璫亟事丹堊水部力爭不得既而雷震柱傾吏議周內遂罹顯戮聞者冤之靜志居詩話

高道素偕太監黃用監造桂邸時黔寇安邦彥披猖兵餉

取給於楚楚又兩邸並建惠邸在荊州桂邸在衡州筦計者謂就國以長幼為先後經費皆緩視桂及逆闖趣瑞惠桂三王同時之國始倉皇給辦期半載竣工於是分界督造道素任承運殿以外用任寢殿以內崇禎己巳用所督寢宮之前殿圯壓斃宮眷辭連道素論死

徵獻

錢虞山作高氏家傳謂道素與用俱逮繫下吏竟寬用而

置道素於法然崇禎紀畧則云與用俱論死意者用乃

監候歟

同上按金道隱書高虞部行狀後云卒期先生死三年之前用死三年之後則監候之說信矣

桂王府第棟梁皆不堪一夕大雨後殿數帶俱傾壓死宮

眷百餘人後遇風雨王必露立深厪復壓之懼也道素

竹林八圩志

卷十二叢譚

五

臨刑閣臣以為請上曰朕若出就藩封就是這榜樣何

請為

崇禎紀畧

高道素萬曆癸卯鄉舉屢不第丙辰乞夢泡子河呂公堂

夢一道士謂曰君與高斗光同年曰斗光我名也安得

更有高斗光道士曰汝乃高道素覺而異之遂更名道

素字卒期己未登進士同榜果有高斗光山東嘉祥人

也

徵獻錄

高工部道素初名斗光萬曆丙辰公車入都乞夢于泡子

河呂公堂夢黃冠告之曰君高斗光同年答曰是吾名

也黃冠曰君乃是高道素寤而異之遂更名後三年己

未榜發中三十六名其同榜九十九名為高斗光山東

嘉祥人也

俞汝言問
史拾遺

公初名斗光丙辰歲夢神告曰會榜有高斗光然非子也

遂更今名己未榜中果有同姓名者

高氏
家傳

錢應金字而介與同郡主事高承埏相友善凡所著述皆

承埏為之序國破走窮鄉避兵為盜所殺承埏葬之作

亡友春波詞人傳應金之未死詣承埏索數十金承埏

碎而與之曰人情擾攘挾重資出必賈禍碎之庶幾可

免應金卒見殺

徵獻
錄

高承埏去涇縣民歌之曰盼公車來何暮計公程去何馬

公內召我何之急攀轅告上司上司揚言不可止入都

門見天子

明詩
綜

竹林八圩志

卷十二叢譚

六

厲公先生表忠裏孝以父死不辜伏闕訟冤絲綸奪者載

錫三宰雷封各著循績而危邦墨守尤文吏所難能惜

乎功多不賞至今寶坻父老有遺憾焉家藏書八十櫝

與項氏萬卷樓爭富雖干戈俶擾不輟吟哦其病中述

志云惟將前進士慘澹表孤墳讀者比之澤畔行吟西

臺慟哭

靜居志
詩話

嘉興高氏稽古堂藏書八十櫝與項氏萬卷樓爭富厲公

先生解組歸田雖當干戈俶擾不輟吟哦案頭留烈皇

帝御書折疊扇一柄有詩云云

見詩
徵

時一展玩每每流

涕臨卒題句云惟將前進士慘澹表孤墳嗚呼亦可以

見其生平志節矣

沈李友樵
李詩繫

五刑宮次于辟肉刑既除墨劓荆永革矣惟京畿民間生子每私自閹割何其忍哉高工部承埏知寶坻縣事下車禁私閹甚力終其任縣民無敢犯者洵美政哉戴斗夜談

厲公先生以庚辰登南宮第時余已學為文章顧未獲負笈問業無幾有甲申之變先生悲憤以死今觀遺跡其為學砥行之概著于言表而書法亦別有蕭散之致風

徽如在遐想慨然

王宏撰書高厲公手迹卷後

敬觀水部翰牘辭氣筆法直追古人識邁品高情超心逸故能自立不朽遠絕時塵念祖大兄寶此家珍日在行笥固四方賢達馳譽前型然蘭生幽谷未嘗因顯晦損益其芬芳也

陳奕禧題同上

竹林八圩志

卷十二叢譚

七

辛卯仲冬念翁老伯來淮安居停荒齋話舊是年八十有三因自靖錄尚未刻成不憚間關持鉢思有所濟也復出虞部公尺牘一卷見示展誦迴環典型如在憶辛未秋杪履端得識念翁于深澤署中迄今已二十年卷中有香泉叔題辭乃辛未閏七月事也今太守已騎箕二年矣對此茫茫益不勝人琴之感

陳履端題同上

辛卯長至後念祖世翁於淮陰厲齋示觀令先君厲公先生手札遺墨瀟灑率真大類元季明初人脫盡啟禎間時賢習氣且聞吾鄉前輩述公宰邑時惠政清操豐功偉績惜未生同其時一覩先正典型也

王嬰跋同上

屯部明水先生為中官嫁禍慘死首輔蒲州公批鱗挽救

卒不可回為之流涕厲公先生於乙酉上書南都訟冤得雪卒復原官補給綸誥是父是子無愧忠孝完人矣

唐翰題詩注

明虞部高厲公先生手牘余於戊申得之滬上盖唐蕉庵家舊物也原裝成卷高不過七寸而粗幾盈兩握所題跋者大都國初諸老厲公先生之高節遺墨固已足重而諸老之題記尤有深意盖桑海之際言外多隱有餘痛不能已也

鄧實跋高厲公先生手牘卷

高厲公先生尺牘卷為其子佑鈇搜集裝為家寶徧乞國初諸老題記乾隆中轉入余外家前輩沈竹岑廣文所藏之五十餘載廣文臨歿招其外孫唐蕉庵司馬付之

竹林八圩志

卷十二叢譚

八

囑曰非其人而與之亦忠魂所不許也表章前哲惟汝之望司馬於道光甲辰重裝述其因緣又附錄高氏事蹟至光緒戊申乃入粵人鄧君秋枚之篋刊諸國粹學報因得知引首雙溪逸叟遺墨六字為錢唐魯孔孫得之書尺牘八通一致巨手社盟兄

吳統持

一致埽翁老親

翁

譚貞默

一致敏翁世伯一致某年臺一致遙翁年盟長

一付鈇鋅兩兒後有佑鈇跋三行題者令支門人劉鴻儒姪奕禧年家社弟汪挺同里曹溶秋溪遺民王遐寶坻後學王嬰陽羨後學陳履端叡山方文姑山繫籍僧芳

徐芳

古猷門人王國彥凡十人其後則沈銘彝詩二律

唐寶銜詩二律並詳叙廣文付託時情形且更有屯部

明水先生手蹟一軸因歎是卷雖三百年來三易其主顧皆不越高家埭百步今則遠游粵海矣合浦之珠還
有日乎嘗以語高明經翰伯謀文姬之贖以力不能及而罷猶幸鄧君發刊學報得見梗概若屯部手蹟尤不可問矣慨自甲午之後士大夫競言新法視古物為陳腐吾友成卿又因家難嘗稍斥所藏然於家珍里寶不忍輕棄成卿殤于丁未此卷戊申乃至滬上且併司馬之颿景催詩圖同入鄧篋縮印列諸市肆首為颿景樓主人三十五歲小像方濬益分書署左角曰又寅左筆庚戌作於龍山次闕鳴珂所繪圖題七古一章右上角隸書帆影催詩圖蕉庵屬廷濟書則叔未解元筆也其後題者陶瑄張應泰王宗

竹林八圩志

卷十二叢譚

九

涑沈亨惠王暎江戴燮曾許乃裕卜葆鈞諸葛燾張廷濟陳德大嚴炳黃安濤諸葛璋諸葛枚徐達源孫灑等又有陳一章書小花峨翁所作颿影樓記小花峨翁者沈竹岑廣文晚號也最後己酉八月潘飛聲為秋枚題二絕句則鄧所為也蓋里中高沈唐三巨室比屋姻婭鄉文里獻初萃于高高微入沈沈又入唐余交成卿十載以時諱談故未嘗請觀其寶藏成卿父子相繼辭世余又不忍萌巧取豪奪之思但聞連年估舶在門時時擇其精粹以去并司馬手稿不留片楮今欲藉以考證此鄉掌故一字不可得為之太息而已祝廷錫知非樓雜綴

松皋公與歷任邑令高登雲金式玉交俱善而莆田林達

尤莫逆達去任時至把臂流涕惟張厥修因漏糧一項
思肥已橐公請於府撥修學宮張甚銜之甲午鄉試公
卷已中填榜時為張力詆而斥又囑後令金鏞吹求其
疵思陷之而無瑕可尋會范忠貞公開府浙江以賑事
蒞禾偶問金令曰貴邑有趙生員名連城者識之乎金
猝對曰知之公曰此人正直言論可采汝當留意蓋公
嘗條陳濬吳淞事為公嘉納也嗣金浼醫生薛楚玉納
交謂苟有教言無不聽命然公屏息不至焉迨後下婁
堰建范公祠公每過之即焚香納拜曰餘生皆公所賜
也公輕財好義鄰有夫婦反目思離異公使人委曲勸
導且遺以金俾復完聚又歲暮見有徘徊橋畔流涕者

竹林八圩志

卷十二 叢譚

十

急回家懷金授之蓋其人無以卒歲憤欲自沈者也年
八十一卒卒之日尚與老友車鈞欽暢論古今興廢談
笑自若晚忽微步拜家祠飲水一杯笑曰予將逝矣安
寢而卒

趙譜

先祖儆舟府君酷嗜香山詩嘗手鈔兩冊紙墨精潔楷法
端整今藏於家愛吟咏而無專稿僅存數首

孟廬札記

恕堂公諱學昂館于崇川劉氏其女主人病羣醫皆束手
謝不敏公入視良久出曰病雖危尚或可治投以猛劑
沈疴竟起於是名噪一時求診屢恒滿戶

趙譜

從伯香萊先生家基為先曾祖端木府君之孫伯祖孝詒
公之長子也以秀水籍中乾隆辛卯舉人數上春官不

第歸而授徒於鄉家無擔石儲又恥於求人凡六徙其居訖無寧宇至不能蓄一僕卒於嘉慶五年八月十日年六十有八易簣時以兩世未葬為憾語極沉痛余時在側親聞之賴女夫張星橋樹勛方官秦中分俸遠致四棺得葬又招先生之孫麗泉相依飲食教誨并為取妻以延先祀孟廬札記

先君子少時從學海鹽方蘭皋先生按原作陸蘭皋據向齋先生手蹟改後得同鄉馮孟亭先生指授遂於辛卯壬辰聯捷故生平最服膺兩先生之教鄉試座主陽湖莊方耕先生長沙劉書臺先生房師金壇王梅村先生會試座主武進劉文定公覺羅奉文勤公歙縣汪持齋先生房師蔣霽園

竹林八圩志

卷十二 叢譚

十一

先生此七先生感激知遇歲時存問不絕後在灤源知奉太夫人高年清況屢分束脩所入寄錢黼堂少宰轉呈少宰復書云敬佩古道實為同門罕有此札今藏于家先君交徧海內有遠隔數千里者有數十年不相見者無不心心相印交貫終始而所最相知者滿洲明正庭先生興也方先君攝吳橋篆明公為天津道委審靜海縣十年不結之命案先君窮十晝夜之力悉心研鞫案遂定公因此見重嘗語顧小韓方伯學潮及家曉村觀察曰此畿輔第一賢員未幾先君去官公深為惋惜每對僚屬言次常形於色丙午夏巡撫山東下車即詢濟南守高君吾莊天鳳曰君在直隸久知沈某乎對曰

知之近況若何又對曰前年主講潞河今書院已裁尚無枝棲公曰速寄信令來吾留灤源以待矣蓋時欲得灤源山長者薦書數百通公皆置之屬意先君也先君既得吾莊信即到京於閏七月朔開館公常以疑事見詢先君知無不言言無不盡而從不干以私後明公以女入為皇孫妃內召司寇瀕行又言於接任中丞牧庵長公麟故終長公任灤源不復更易山長同上

乾隆壬辰武進劉文定公綸為會試總裁先君卷已定元十日後因三場小疵改置第五公薨先君哭以詩有云五色雲開方奪錦三神風引又迴檣結句云墨綬乍拖旋棄甲回思期望屢沾裳注云余作令江西拜別時公

竹林八圩志

卷十二 叢譚

十一

曰官不在小汝隣縣朱高安亦以縣令起家汝其勉之同上

先君待人以誠持躬以敬一生不言人過辛亥在濟南見有負其友者感賦云贏得羲之數字真留傳片紙伴閒身莫將缸面酣蕭翼賺取蘭亭即此人余於乙亥年亦見有素叨庇蔭而其人一病即忍負之者得句云蔽日干霄是茂林愛他座內有清陰寄言老樹無憔悴恐動居人剪伐心同上

先君以乾隆丙午秋七月至濟南主講灤源暇輒放棹大明湖中篙師漁父無不相識及辛亥春三月將往青州孫碩亭趙睦堂臧厚圃諸先生餞於湖上先君即席賦

詩留別上同

尹文端公第五子慶霖字雨林號晴村官青州都統時先
君主講雲門唱和詩及尺牘極多有問先君疾詩云秋
花三徑一床書知己偏教兩地居永夜風聲添寂寞老
年心事少舒徐君因小病間情減我更多愁午夢虛為
問松窗高士臥日來眠食復何如辛亥冬先君將旋里
復首唱一詩送行和者百人趙南莊大令大漉彙書一

卷今藏聽松閣上同

歷城西南十五里有臥狼山其上穴產五色石光明可
鑑故又名寶石山余嘗得其一帶歸為人攫去先君題
灤源書院北軒楹帖云靄若春雲蒸寶石皎如秋月印

竹林八圩志

卷十二叢譚

十三

華池華池為吾鄉桑弢甫先生主講時所鑿上同

先君得洪武二年劉基宋濂王禕三家送天台錢允一齋
鐵券東歸詩墨迹宋詩烏絲闌小楷劉行書王草書均
極古茂見者無不驚為瓌寶至今珍藏聽松閣不敢輕
示人也嘉慶癸亥張文漁徵君借刻入重定金石契中
宋濂詩序云皇帝即位之二年秋八月大將軍帥師取
燕都西北州郡次第皆平而天下歸于一統越明年之
冬上將親御袞冕郊祀天地大告武成復念開國諸臣
勞烈之多錫以鉄券以申河山帶礪之誓前一月下禮
官議其制度近臣言唐和陵時嘗有賜於越錢武肅王
其十五世孫尚德實寶藏之上遣使即其家訪焉尚德

既奉詔櫝券及王遺像上之上御外朝與丞相宣國公臣善長禮部尚書臣亮主事臣肅觀之皇情悅豫敕省臣宴尚德於儀曹恩意有加焉已而尚德東歸陛辭之日命還其券與像以禮敦遣之余時待罪禁林尚德以余知其事頗詳請序其故而繫之以詩夫錢氏寶有此券已五百載宋淳化中杭之守臣嘗連玉册進之元豐五年又進之宋季兵亂券沈官渭水中者五十六年元至順二年漁人獲之而售于尚德之父世珪迄今有道之朝而尚德又進是嘗三登天子之廷其間或顯或晦雖若類靈物呵護之亦其子孫之多賢始能保守而弗墜也歟抑吾聞武肅之有國吳越同時據有一隅以專

威福者前後之蜀南北之漢以至吳楚閩唐南平號為十國計其士馬之精強城邑之壯麗府藏之充物意盛氣得亦可謂一時之雄曾未旋踵夕陽芳草淒然有餘悲矣況望其子孫保其故物於十餘世之後乎由是觀之錢氏之樹德也深矣皇明肇造區夏媿隆唐虞凡前代文獻之可考者莫不訪求之家世載明尚德且將出躋臚仕以佐明時斯券之徵盖特為之兆爾余因不辭序而詩之於以見尚德遭逢之盛未止於此而他日相遇必當以余為知言云尚德字允一天台人大明天子開鴻基雄兵百萬皆虎貔東征西討十餘載變化不啻雲雷隨功成治定四海一剖券分符恩澤施前王遺制

久已泯錢氏世寶猶無虧天使持書往徵取有翁負橐
來丹墀鞠躬俯伏再拜起旋解韜藉重重披精鐵煅成
大踰瓦中突旁偃形如箕又如圓甌剖其半一片如玉
誰瑕疵鑿窾填金文絢爛筆畫方整蟠蛟螭誓詞三百
有餘字河山帶礪無嫌疑繼陳五王有真像彷彿猶是
唐冠衣腰圍白玉金作鈔吻角左右分三髭重瞳回光
屢下照笑語愈覺天顏怡便敕大官給珍饌上尊法酒
澆瓊卮憶初唐綱既解紐恣舞鱖鯁號狐狸斗牛王氣
果凌厲豫章占術元非欺八都健卒猛如虎指揮不異
驅嬰兒羅平鳥圖騁怪幻內黃外白跳狂癡龍劍一揮
赴水死大勲星日同昭垂因茲錫券代牲畝彭城開府

竹林八圩志

卷十二 叢譚

十五

如三司衣錦城空嘉樹老共守尚有三樓危淳化元豐
兩進入龍光曾受天王知炎精訖錄九鼎沸一旦失去
官河麋豈伊神物欲變化相逐雷劍為龍飛孰知漁且
一舉網所獲非鼈還非龜終然鬼物所訶護不使光采
埋荒陂泥塗沙礫幸免累寶玉大弓欣有歸我知天意
實有在武肅宏烈何堪微八洲生靈數百萬拔出水火
行中達子孫食報豈終極政如稼穡隨年肥高牙大纛
入黃閣金章鑿綬趨彤闈不知堆床定幾笏但見肘印
懸纍纍七世珥貂未足擬一門三戟終前衰况翁文彩
爛五色嗜古不管頭垂絲秦淮呼酒話離別遠盼官舫
如星馳於時同雲羣四野勢欲釀雪增寒威行行若過

表忠觀好別蒼蘚觀殘碑劉基詩并序天台錢允一先生武肅王之孫也洪武二年奉命持其所藏鉄券赴京師漫成三絕句以贈之戡亂安民不為私英雄心事鬼神知金書長共兒孫在又見山河一統時日出咸池蜃氣消扶桑霞起赤城標春風到處花如錦不用捫蘿過石橋一別須臾十五年白頭相見倍相憐天台山下桃花洞應許閒人艤釣船王禕詩錢君來自東海濱自言乃是錢王孫錢王到今十五世重珪疊組多後昆惟王武肅王吳越十有三洲兼兩浙雖然五季事干戈獨使斯民樂生業憶昔武肅初起時揮戈指日日為低董昌為昏擾鏡水一麾梟獍坐誅夷唐皇當宐生太息謂王

竹林八圩志

卷十二叢譚

十六

之勲關社稷兩鎮節度未足多更頒寶券為王錫斧鐵作版黃金書字畫嚴勁言勤劬上言功勛果無敵下言信誓久不渝子孫傳家五百載啟櫝星辰絢光采入水不泯火不銷神物懸知如有待聖皇御極百度新蒐網舊典昭人文錢君奉向明光獻重瞳盼來天顏忻有詔還君作家寶商敦周彝奚足道從茲更可歷千齡物乃不朽須人保江南十月天雨霜早寒歷歷侵衣裳錢君長揖謝卿相明發扁舟歸故鄉歸家教子用詩禮子復教孫孫更子媿余詞藻就荒蕪為君世美孟廬

謹按相傳銘彝有一卷珍若環瑰臨卒之前有人乘問疾微露覬覦之意銘彝掉頭向內不復與言去命其楷外孫唐翰題曰吾死必以卷殉翰題遂遺命納卷於

解元也

乾隆壬辰先居於京師小市以百錢購得山水一幅款署雙江筆墨疎秀懸之旅壁徧詢賞鑑家均不知為何人也是冬履任上高閱縣志乃知李堅字雙江邑人先君上高竹枝詞中曾及之盖深喜翰墨因緣也同上

先君在京師小市收得曹知白秋雨梧桐圖倪元鎮疎林小幅吳匏庵書洛神賦長卷崔子忠設色山水及蘇子瞻端硯定武蘭亭石刻等物愛玩不釋手罷官後盡易錢以償債負並資旅給每一念及時有米老蟾蜍之恨一日讀盛秦川大令百二 柚堂續筆談有云夫天下無不散之物存此一段公案足矣先君曰秦川此語乃佛

竹林八圩志

卷十二 叢譚

十七

家十空四解脱之妙諦也同上

先君愛蓄硯收藏亦富然遇知音亦隨手貽贈略無吝惜旁人問之則引古人語在彼猶在此也以自解有水坑硯琢百蚌形自題云此硯潤澤如脂撫不留手純是蕉葉白面有火捺麻雀斑數點邊有硃痧痣有蟻血有蟲蛀端溪下層石也銘曰盖取諸離中虛外容翕闢隨時盈虧應月吐有夜珠爭無野鴿乃含章之可貞豈必海之是測硯得之河南裕州携之篋中二十年矣乾隆辛亥在雲門書院束裝歸里都統慶公霖來送行先君乃以此硯贈別又方田硯先君自識云質細而色潤青華凝結貯盆水中以日照之鮮紫中盈翠藍浮動真所謂

雨過天青也為陳君雯所贈乾隆己酉秋榜後兩主試
馮星實吏部應榴陳桂堂農部廷慶來訪灤源書院馮
見此硯贊不絕口先君乃贈之而以真孔林蒼草一束
贈桂堂焉又有斧硯上狹下濶形如古鉏追琢渾璞四
圍黃臙鳳涎及蟾血相間先君云得諸京師琉璃廠舊
有篆書銘歎以其不甚佳確去後悔焉因誌其舊銘云
磨而不磷涅而不淄石質天然永壽吾師十六篆字下
有楷書門人黃松銘奉理堂夫子鑒思更作一銘以盡
此硯之美未果也此硯於乾隆丙午春先君卧病京廩
杭州章桐門先生於先君為同年友日來問疾且為稱
藥量水感其意贈之又有玉帶硯先君自識云此硯通

體蕉白且白之至非他硯可比質之細潤真膩若小兒
之腹左邊有火捺散暈如雲右邊青華蘊結成團腰圍
玉帶有翡翠有金線有鷓鴣斑有蟲蛀水坑之奇莫是
過矣余生平最嫌黃岡村人琢為奇巧天真盡失因自
琢此硯隨石勢凹凸略為受墨之所且青花一團適當
硯池琢連環以誌池形不忍深鑿也閱者諒余愛石之
衷可耳硯於乾隆乙丑在保定贈百泉又有黃龍紋硯
先君自識云此研淡紫色略浮藍翠嫩如海棠以手指
掐之若恐有痕者右邊有黃龍紋左有蟾血翡翠鳳髓
麻雀斑種種異彩東洞中層石也在灤源時不知持贈
何人又有竹節硯紫色中火捺疊現琢手渾璞古雅先

君自製一銘屬李良玉刻之以贈長牧厂尚書麟惜銘
詞未存稿又四眼硯乾隆己丑先君過大雲溪程氏中
表庭望先生舉以見贈盖先母程太夫人家藏名硯也
先君喜甚為作長歌紀之今載依竹山房詩集中硯四
圍如蠟質純淡青紫面亘黃龍紋鸚鵡眼大如指頂暈
重重亦如指羅紋中有瞳子面背各二澤以水爛爛有
光奇品也相傳為雲東逸史舊物明崇正間有漁人淘
于姚氏宅旁得之程氏購藏盖閱百數十年矣先君以
外氏先世留遺寶守甚摯今尚藏聽松閣上同
余家舊藏項易庵水墨山水兩松挺立層巒高聳瀑布奔
注下亘石梁一人矯首背坐其上靜玩飛泉運筆秀潤

竹林八圩志

卷十二叢譚

十九

自題二絕云靜對有餘韻風雨更多情每到空巖下翻
嫌瀑布聲長空不絕響山高不斷雲此中堪結屋可與
世無聞丁酉嘉平月浴佛日雨窗寫此並錄舊作二首
古胥山樵項聖謨識上同

謝牧園大令

士舉

先君門下士也乾隆乙酉拔貢朝考一

等以知縣發浙江歷署太平石門會稽慈谿丁卯戊辰
間余疊遭大故以不能營窀穸遺書走謁牧園於慈谿
牧園談及家事輒為流涕詢營葬刻書孰急余曰葬為
急牧園曰然即分俸五十金為麥舟之助又得湯百泉
五十金耿顯庭二十金乃合葬我考妣於孟莊之原牧
園即題補湯溪未到任卒於慈谿時嘉慶十三年七月

三日也余為位而哭以詩同上

歷城李湘浦大令廷芳篤於師門氣誼乙亥秋在吳江分

俸為先君刻灤源問答一書讀者莫不慕義道光己酉
湘浦以英德令解河工餉道出杭州余亦適至相見於
杜石樵學使署中歡然道故時余以先君雪浪齋文稿
求學使作序湘浦一見即請携往粵東付梓余喜而贈
詩其明年湘浦權篆南海即為選工開雕於丁亥八月
四日將全版寄到湘浦布諾不忘不以菀枯歧視且念
舊之心有加無已實今人所無可感也同上

吾家系出沈師橋第八世祖顯宗公元末徙居嘉禾之竹
林里傳至銘彝蓋十三世矣銘彝敬念先德輒思命駕

竹林八圩志

卷十二 叢譚

二十

長途修阻卒卒未果也至戊辰春始得拜瞻祠宇宗人
萬皆備尤敦古處余作詩紀事使後世子孫不忘根本
云爾同上

戊辰二月在杭州遇雨避入錢塘門市肆見有尹文端公
真跡傾囊易歸乃與吾鄉錢宮傳倡和之作共詩十一
首寫六紙署望山侍尹繼善同上

戊辰三月偕紹興府學教授陳珊浦光鑾探禹穴觀窆石
歸途購草書一幅署水心亭主人考是明徐中山長子
輝祖襲封魏國公者所書喜其遒勁付裝潢並題句於

同上

余於丁丑年大病郡中相傳已死此家麗川弟所語余者

後王品蓮又謂癸未秋復盛傳余死因賦長歌紀之畧云東坡謫海南羣傳其已死亦有倪雲林謠詠乃類此近來尤西堂下及子才子均各遭譴言紅塵忽脫屣賤子何幸媿諸公兩番兜率歸彳宮捕風捉影不可曉按之其言皆齊東結云作詩笑寄吾友並吾弟雪中高卧依舊老袁安同上

今郡中有天罡黨見於告示秀邑有天狗黨此二黨已辦出海鹽有蠨蝦黨嘉善有丫叉黨而敝里則由平湖蔓延而來名曰老鼠黨沈銘燹與何杏江書

郡中天罡黨尚未見究治而鄉間所稱地煞黨老鼠黨者愍不畏死何啻千百人惡直醜正實繁有徒居是邦者

竹林八圩志

卷十二 叢譚

二十一

大有燕巢幕上之危

又與陳鏡帆書

嘉興沈廣文竹岑博學工詩喜藏金石文字隸書尤妙嘉

慶間濟南耿顯庭

惟祜

為石門令聘修縣志聞崇福寺

有井穿自景泰年急訪之見井闌殘字猶存因作七古一章議論平允可稱詩史竹岑勤學植品克敦內行其父向齋病廢泣禱於神願減算益親壽宋大樽耐冷談

沈竹岑廣文淵源有自復博極羣書所著孟廬札記今值重修邑志里中文獻俱藉資考証焉其為詩多抑塞愁慨之音蓋既不得志於有司又抱喪明之痛奔走疾病甚至焚棄筆硯衰老以死文人之厄於廣文為已極

悠求有益齋詩話

李道

沈秋巒明經工畫山水今年夏祝君小雅購得一幀示余
蕭間疎遠幾入清閼之室而叔未先生曾不之及則當
時深自韜晦不自炫其能為不可及已同上
又來圩李家宅基當粵匪時有外來金姓者行八失其名
以善捕鳥人以讀去聲鳥讀了切老八呼之讀的鳥云者以
膠塗竿伺鳥所向粘其羽而獲之也老八神其技珍禽
異羽無論動靜飛宿不失十一猶痾僂之承蝸也自謂
識鳥性通鳥語更能使鳥媚人語終日與禽為伍故藝
之精如此余幼時常見之老八善泅泳巨浸大澤視若
平地沈浮上下一惟其意入水捕魚又如鷗鷺光緒乙
酉丙戌間因捕巨鰻久不獲傷氣致病而死老八曾被

竹林八圩志

卷十二 叢譚

二十一

擄於粵匪以其技博賊渠歡日令赴野捕鳥而以數賊
監之一日老八忽動歸思遇一巨鳥乘機窮追為鷹鷂
之逐遂脫於賊而隨其親串來居於李家宅基徐文彬遺聞述
畧

明平湖趙比部維寰焚餘稿云吾家起邑東陞始祖墓在
瀕海之錢公亭始祖祖母沈貞人為石窗先生嫡姑其作
姑誌銘云貞人沈穀瑶女適趙璧璧瑞卿子也字伯玉
係宋宗室與琚後沈所生諸孫兄弟三人以泰字分序
次長泰一徙林竹廟後有趙季川者其裔也泰二則南
分隱居家是泰三則北分吾家是據此竹林之趙見於
文字者有三焉一知丞汝堦一爨齋一泰一今宿圩福

村橋外尚有趙家堦之趙兩家派別是一是二數典早忘而所謂季川者亦未見於記載文字放失源流溷淆所存趙譜又未足深據姑識之以俟博聞者

知非樓雜綴

蕉庵司馬畢生蒐藏以周琥為最古成卿嘗一出眎至今猶留心目中其所作考成卿攝印後以一紙相貺得據以入八圩志今寶物已渡太平洋而西使里人猶得髣髴其形色賴此文耳又有白玉藥鏟溫潤而栗成卿愛而常佩之今不知所在矣唐氏古物余僅見此二者乃知過眼烟雲非有福緣亦不易得昨歲庚午有人於字籠中檢得唯自勉齋書目一冊塗抹殘破不可卒讀上鈐江蘇通州官印書面後幅司馬手書此冊五十四櫝

竹林八圩志

卷十二叢譚

二十三

下殘闕
數字

庚午冬止存本二千元二行其編書櫝之號曰桃紅復含宿雨柳綠更帶朝烟花落家僮未掃鳥啼山客猶眠二十四櫝一萬一千餘卷又布衣暖菜根香與會佳師法古十二櫝五千餘卷又恭敬擗節退讓以明禮和親康樂安平為一書十八櫝八千餘卷都二萬五千卷經部有汲古閣刻十三經孝經衍義百卷元板隸韻五十卷初印隸篇翻宋本玉篇明翻宋本廣韻元板林注左傳元刻六書正譌十二冊元刻漢隸分韻元板明修說文字原六書正譌史部有初印汲古閣十七史明南監本廿一史元刻元印史記集解索隱四十冊初印凌刻棉紙史漢評林六十四冊汲古吳郡志五十卷

吳校影宋元豐九域志十卷精鈔至元嘉禾志三十卷
影宋鈔淳熙三山志四十二卷影宋新安志玉峰志正
統藍印金遼志六卷正德姑蘇志六十卷嘉靖嘉興府
圖記十冊棉紙初印嘉靖大和山志嘉靖湖州志嘉靖
司禮監文獻通考百冊元板金稗粹編影宋鈔唐六典
三十卷舊鈔宋大詔令二百四十卷精鈔浙江人物考
浙江山川古跡考俱陳鱣藏書舊鈔馬氏經籍志三冊舊鈔
吳興掌故十七卷舊鈔靖康雜錄十二卷丁龍泓西湖
金石志稿何義門手校酌中志二十一卷述古堂原鈔
敏求記明刻列女傳初印殿板明史百冊元刻金薤琳
瑯二十卷初印金石存子部有元板圖繪寶鑑六卷舊

竹林八圩志

卷十二 叢譚

二十四

鈔習學記言五十卷翻宋百川學海五十二種初印佩
文齋書畫譜百卷嘉靖晉藩本初學記三十卷原板說
海四集鈔本珊瑚網二十二冊罔極前後錄三卷元板
明修玉海百冊拜經樓藏書影宋彩印古玉圖說元板
元印本草衍義金刻宣明論方刻內經宋板濟生拔萃
宋刻大成論方鈔本元嘉興危六林世醫效方嘉靖刻
素問鈔九卷舊鈔彳珠密語集部有舊鈔元次山集十
卷鈔本陵陽文集四卷舊鈔足本尹河南集二十八卷
附一卷影宋鈔小畜集拜經樓藏書舊鈔始豐集十四卷舊
鈔楊誠齋詩九種四十二卷元翻宋大字巾箱本嘉祐
集吳伊人校唐宋百賢文集十二卷帶存堂集十七卷

正統刻東里集二十五卷元板元遺山集元板歐陽外
集翻宋韓文考異二十卷東雅堂韓文明翻元板李善
注文選會通館文苑英華纂要辨証慎獨齋宋文鑑初
印百三名家集初印汲古元人十集五十卷列朝詩集
一百六十卷皆今日難得罕見之本每種之下必估以
價值以今論之奚翅十倍其精者間標入樓二字於眉
可知樓上所儲必尤有名貴者然不在此目今不可考
矣以余所聞有宋板樂書亦未見於此錄至其所儲石
墨卷軸皆未著錄成卿嘗言有晉唐小楷一部售洋千
元又有一卷子光緒初售與吳興陸仁齋觀察得八
百金惜未言其名是知司馬之收藏在同光間實可甲於一

竹林八圩志

卷十二叢譚

二十五

郡也

同上

右稿屬草庚申罅漏鉤沈復十載餘頭白踰期殺青
猶待茲更目霧神越增益難希夫囿六七里域贅十三
萬言殫一手足烈拾七百年墜蕪尤罅漏俱既不免方
志之隘又其最矣未能藏拙姑付攝印以貽大雅之
譏而敦不賢之識壬申長玉俟翁記

時年六十有八

